



Broj/ Број : 02/2-50-1-13-51-28/06  
Sarajevo/ Сарајево : 12. 6. 2006.

## **Z A P I S N I K**

### **51. sjednice Komisije za vanjsku i trgovinsku politiku Doma naroda Parlamentarne skupštine BiH održane 6. 6. 2006.**

Pedesetprvu sjednicu Komisije za vanjsku i trgovinsku politiku Doma naroda Parlamentarne skupštine Bosne i Hercegovine sazvaio je predsjedavajući Komisije Hasan Čengić.

Sjednici su prisustvovali sljedeći članovi Komisije: Hasan Čengić, Velimir Jukić, Osman Brka i Ruža Stojanović, kao i Nevenka Savić, sekretar Komisije. Anto Spajić i Vinko Radovanović bili su opravdano odsutni.

Sjednici su u svojstvu predstavnika predlagača prisustvovali: Radomir Bogdanović iz Ministarstva vanjskih poslova; Hajrudin Podbirčanin iz Ministarstva vanjske trgovine i ekonomskih odnosa; Ivica Rotim iz Kabineta predsjedavajućeg Vijeća ministara BiH; Željko Topić i Mirsad Salkić iz Državne regulatorne komisije za električnu energiju; Nihad Fejzić iz Ureda za veterinarstvo BiH; Ljuban Gligorić iz „Mlijekoprodukta“ Kozarska Dubica; Gordana Tomić iz „Meggle“ Bihać i Stjepan Milašić iz „Mljekare“ Tuzla.

Sjednicom je predsjedavao predsjedavajući Komisije Hasan Čengić. Nakon što je konstatirao da postoji kvorum, predsjedavajući Komisije je predložio da se u Dnevni red doda tačka pod nazivom „Problemi sa izvozom mlijeka u zemlje sa kojima Bosna i Hercegovina ima potpisane bilateralne sporazume o slobodnoj trgovini“. Prijedlog je usvojen jednoglasno, kao i sljedeći:

### **D O P U N J E N I D N E V N I R E D**

1. Usvajanje Zapisnika sa 50. sjednice Komisije;
2. Prijedlog zakona o izmjenama i dopunama Zakona o carinskoj politici Bosne i Hercegovine - predlagač Vijeće ministara BiH;
3. Zaključci sa Javne rasprave: “Razmatranje aktivnosti za podsticanje privrednog rasta, povećanje izvoza, smanjenje trgovinskog deficita i osiguravanja dodatnih povoljnosti za strana ulaganja u Bosni i Hercegovini“ održane 14. marta 2006. godine;

4. Davanje saglasnosti za ratifikaciju Ugovora između Bosne i Hercegovine i Republike Makedonije o međusobnom izvršavanju sudskih odluka u krivičnim stvarima - predlagač Predsjedništvo BiH;
5. Davanje saglasnosti za ratifikaciju Ugovora između Bosne i Hercegovine i Republike Makedonije o izručenju - predlagač Predsjedništvo BiH;
6. Davanje saglasnosti za ratifikaciju Evropske konvencije o kinematografskoj koprodukciji - predlagač Predsjedništvo BiH;
7. Tekst Odluke o obimu, uvjetima i vremenskom rasporedu otvaranja tržišta električne energije u Bosni i Hercegovini – predlagač Državna regulatorna komisija za električnu energiju;
8. Rezolucija Evropskog parlamenta o strategiji proširenja, dokumentu Evropske komisije iz 2005. godine – informaciju dostavilo Ministarstvo vanjskih poslova BiH;
9. Izvještaj sa međunarodnog foruma o informaciono-komunikacionim strategijama i ulaganjima (IFISI), Marakeš (Maroko), 01. 03. 2006. - 03. 03. 2006. godine;
10. Problemi sa izvozom mlijeka u zemlje sa kojima Bosna i Hercegovina ima potpisane bilateralne sporazume o slobodnoj trgovini;
11. Tekuća pitanja.

#### **Ad 1. Usvajanje Zapisnika sa 50. sjednice Komisije**

G. Čengić predložio je sljedeće dopune Zapisnika:

- Na trećoj strani, ad. 2. predposljednji stav: iza riječi “Prvi prijedlog” dodati tekst “čiji je predlagač g. Čengić”;
- Na trećoj strani, ad. 2. posljednji stav: iza riječi “2 glasa protiv” dodati – protiv su bili: Hasan Čengić i Osman Brka”;
- Na 5. strani, ad. 8., u posljednjem stavu: iza riječi “Svjetska banka je otkazala projekat” staviti zarez i dodati tekst: “svojim dopisom br. 01-ST-2-22-II-127/06 od 17. 05. 2006. godine.”

Sa ovim izmjenama Zapisnik je jednoglasno usvojen.

**Ad 2.** Prijedlog zakona o izmjenama i dopunama Zakona o carinskoj politici Bosne i Hercegovine - predlagač Vijeće ministara BiH;

Predsjedavajući g. Čengić upoznao je prisutne sa osnovnim podacima o Prijedlogu zakona: Vijeće ministara BiH, kao ovlašteni predlagač, dostavio je Prijedlog zakona 10. 2. 2006. godine u parlamentarnu proceduru sa zahtjevom da se Prijedlog zakona razmatra u skladu sa članom 99. Poslovnika Doma naroda.

Dom naroda Parlamentarne skupštine BiH, na svojoj 54. sjednici održanoj 21. 02. 2006. godine, razmatrao je i prihvatio zahtjev predlagača za razmatranje prijedloga zakona po hitnom postupku u skladu sa članom 99. Poslovnika Doma naroda.

Ustavno-pravna komisija Doma naroda Parlamentarne skupštine BiH na svojoj 49. sjednici, održanoj 17. 2. 2006. godine zaključila je da je prijedlog zakona podnesen od ovlaštenog predlagača i da je u skladu sa Ustavom BiH, te da može ići u dalju parlamentarnu proceduru ka nadležnoj komisiji.

Na sjednici Komisije o Prijedlogu zakona, u svojstvu predstavnika predlagača, govorio je g. Podbirčanin. G. Jukić postavio je pitanje zašto još nisu izvršene izmjene i dopune zakona u sa ciljem oslobađanja repromaterijala od uvoznih dažbina. Nakon sprovedene opće rasprave i rasprave o pojedinostima Komisija je:

1. Jednoglasno podržala principe zakona.
2. Konstatirala da amandmana na Prijedlog zakona nije bilo.
3. Komisija je jednoglasno usvojila tekst Prijedloga zakona o izmjenama i dopunama Zakona o carinskoj politici Bosne i Hercegovine u predloženom tekstu, te predlaže Domu naroda Parlamentarne skupštine BiH njegovo usvajanje.

### **Ad 3. Zaključci sa Javne rasprave: “Razmatranje aktivnosti za podsticanje privrednog rasta, povećanje izvoza, smanjenje trgovinskog deficita i osiguravanja dodatnih povoljnosti za strana ulaganja u Bosni i Hercegovini“ održane 14. marta 2006. godine**

G. Čengić je izložio hronologiju događaja od ideje da se organizira javna rasprava do ovog materijala i metodologije za njegovu pripremu. G-đa Stojanović je predložila da se u Zaključke i preporuke na strani 3. u podnaslovu „Strateška određenja“ iza teksta „Uspostaviti Ministarstvo poljoprivrede Bosne i Hercegovine i Ministarstvo za nauku, tehnologiju i istraživanje Bosne i Hercegovine“ doda tekst „u skladu sa Ustavom BiH“. Prijedlog je usvojen većinom glasova (3 glasa „za“, 1 glas „protiv“ – protiv je bio delegat Osman Brka).

Nakon toga, članovi Komisije jednoglasno su usvojili dokumenat sa gore navedenom dopunom i odlučili da ga upute ka Domu naroda u dalju parlamentarnu proceduru.

### **Ad 4. Davanje saglasnosti za ratifikaciju Ugovora između Bosne i Hercegovine i Republike Makedonije o međusobnom izvršavanju sudskih odluka u krivičnim stvarima - predlagač Predsjedništvo BiH**

O Ugovoru su govorili predstavnik predlagača g. Bogdanović i predsjedavajući g. Čengić. G. Čengić je istakao da je se ovim Ugovorom dopunjava set ugovora o pravnoj pomoći sa Republikom Makedonijom. Ugovor je baziran na punom reciprocitetu strana.

Nakon toga, članovi Komisije su jednoglasno odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Ugovora.

### **Ad 5. Davanje saglasnosti za ratifikaciju Ugovora između Bosne i Hercegovine i Republike Makedonije o izručenju - predlagač Predsjedništvo BiH**

O Ugovoru je govorio predsjedavajući g. Čengić. Ugovor predstavlja naredni korak u saradnji dvije države i podrazumjeva izručenje osoba državljana druge države, izuzev političkih

i vojnih krivičnih djela. U raspravi je konstatirano da u članu 3. postoji štamparska greška. Umjesto teksta „...iz člana 3. tačka 2.“ treba da stoji tekst: „...iz člana 2. tačka 2.“.

Članovi Komisije su jednoglasno odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Ugovora.

#### **Ad 6. Davanje saglasnosti za ratifikaciju Evropske konvencije o kinematografskoj koprodukciji - predlagač Predsjedništvo BiH**

O odredbama Konvencije govorio je g. Čengić, istakavši da je pozitivno da se definiira koprodukcijski status, distributerska prava, pravo upotrebe jezika, pristup tržištima i druga pitanja koja će doprinijeti daljem razvoju bh kinematografije.

Članovi Komisije su jednoglasno odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Evropske konvencije.

#### **Ad 7. Tekst Odluke o obimu, uvjetima i vremenskom rasporedu otvaranja tržišta električne energije u Bosni i Hercegovini – predlagač Državna regulatorna komisija za električnu energiju**

Predsjedavajući g. Čengić zahvalio se u uvodu na odzivu rukovodstva DERK-a da prisustvuju sjednici Komisije i članovima Komisije pruže potrebna pojašnjenja i odgovore na njihova pitanja.

G. Salkić je rekao da je Odluka u skladu sa svim zakonskim propisima, i državnim i entitetskim, koji se odnose na reguliranje proizvodnje, prenosa i distribucije električne energije. DERK je u obavezi da donese ovu odluku u zakonom predviđenom roku. G: Salkić je najavio dolazak u parlamentarnu proceduru, u postupak saglasnosti za ratificiranje, Ugovora o uspostavi energetske zajednice čiji je osnovni cilj stvaranje stabilnog regulatornog i tržišnog okvira za proizvodnju, prenos i distribuciju električne energije, koja je preduvjet za ekonomski razvoj i socijalnu stabilnost. Odluka, inače, predviđa otvaranje 30 % tržišta u prvoj godini. U diskusiji su učestvovali g. Čengić, g. Brka, g. Jukić i g-đa Stojanović. Pitanja članova Komisije su se odnosila na moguće negativne posljedice za domaće proizvođače, u smislu potrebnih preduvjeta, tehničkih prenosnih karakteristika, mogućnosti razvoja prenosne mreže, mogućnost povećanja cijena električne energije.

Na kraju diskusije, članovi Komisije su većinom glasova (delegat Osman Brka je bio suzdržan) usvojili Zaključke:

1. “Komisija smatra da Državna regulatorna komisija za električnu energiju BiH mora voditi računa o postepenom otvaranju tržišta i snosi punu odgovornost radi osiguranja domaćih kupaca, ali i proizvođača električne energije, u smislu obezvrjeđivanja kapaciteta kroz moguće smišljeno i planirano dampiranje cijena uvozne električne energije, radi jeftinog privatiziranja domaćih proizvodnih kapaciteta.” – koji se upućuje DERK-u; i
2. “Komisija smatra da odgovorne institucije u BiH trebaju učiniti dodatne napore radi kvalitetnog i funkcionalnog organiziranja domaćih proizvođača električne energije kako bi se racionalizirali troškovi proizvodnje i osigurale konkurentne cijene električne energije tih proizvođača.” – koji se upućuje Vijeću ministara

BiH, Ministarstvu vanjske trgovine i ekonomskih odnosa i entitetskim vladama.

#### **Ad 8. Rezolucija Evropskog parlamenta o strategiji proširenja, dokumentu Evropske komisije iz 2005. godine – informaciju dostavilo Ministarstvo vanjskih poslova BiH**

O Rezoluciji Evropskog parlamenta ukratko je govorio g. Bogdanović, u svojstvu predstavnika predlagača.

Članovi Komisije primili su informaciju k znanju.

#### **Ad 9. Izvještaj sa međunarodnog foruma o informaciono-komunikacionim strategijama i ulaganjima (IFISI), Marakeš (Maroko), 01. 03. 2006. -03. 03. 2006. godine**

Članovi Komisije primili su Izvještaj k znanju.

#### **Ad 10. Problemi sa izvozom mlijeka u zemlje sa kojima Bosna i Hercegovina ima potpisane bilateralne sporazume o slobodnoj trgovini**

Komisija za vanjsku i trgovinsku politiku Doma naroda, na zahtjev mlijekoprerađivača izvoznika, uvrstila je radi važnosti i hitnosti, ovu tačku na Dnevni red.

U raspravi povodom ove tačke Dnevnog reda učestvovali su predstavnici mlijeko proizvođača i prerađivača – izvoznika: “Mlijekoprodukt” Kozarska Dubica, “Meggle” Bihać i “Mljekara” Tuzla, kao i predstavnik predsjedavajućeg Vijeća ministara BiH i Ureda za veterinarstvo BiH.

G. Gligorić je iznio probleme koji su se pojavili pri izvozu mlijeka u Hrvatsku, kada je putem medija u Hrvatskoj njihovo mlijeko okarakterizirano kao „sumnjivo“. G-đa Tomić je objasnila kakve probleme „Meggle“ ima pri izvozu u Makedoniju zbog uvođenja uvoznih dozvola i zahtjeva za polaganje depozita za svaki kamion robe. G. Milašić je rekao da njegova firma nailazi na problem pri izvozu u Srbiju zbog naziva „Alpsko mlijeko“ na ambalaži, iako je to sasvim u skladu sa zakonom jer je Ljubljanska mljekara većinski vlasnik.

U raspravi su učestvovali svi članovi Komisije, a na kraju su jednoglasno usvojeni sljedeći Zaključci:

1. Predlaže se Domu naroda da zatraži od Vijeća ministara BiH i entitetskih vlada da pruži podršku domaćim mlijekoprerađivačima i posebno izvoznicima mliječnih proizvoda.
2. Traži se od Vijeća ministara BiH da putem mješovitih komisija za praćenje provođenja bilateralnih sporazuma o slobodnoj trgovini riješi pitanje barijera izvozu mlijeka i mliječnih proizvoda u Republiku Hrvatsku, Makedoniju i Srbiju.
3. Traži se od Vijeća ministara BiH da se redovito preduzimaju potrebne mjere radi kontrole proizvoda koji se uvoze u BiH i druge mjere iz područja nadzora prometa mliječnih proizvoda porijeklom izvan BiH.
4. Traži se od Ministarstva vanjske trgovine i ekonomskih odnosa da organizira sastanke (najmanje jedanput u dva mjeseca) uz prisustvo predstavnika mlijekoprerađivača, entitetskih

vlada, Ureda za veterinarstvo BiH, Agencije za kontrolu hrane BiH i ove Komisije radi praćenja pitanja iz područja prerade, prometa i izvoza mlijeka i mliječnih proizvoda u BiH.

Članovi Komisije su, takođe, zaključili da zatraže od Kolegij Doma naroda da zbog važnosti i hitnosti ove problematike uvrsti gore pomenutu tačku na Dnevni red prve naredne sjednice Doma naroda, a da se Zaključci, kako ih je usvojila Komisija, razmatraju i usvajaju u skladu s procedurom.

#### **Ad 11. Tekuća pitanja.**

- a) G. Čengić je predložio da se Komisiji za vanjske poslove Skupštine Crne Gore uputi čestitka povodom proglašenja nezavisnosti Crne Gore.
- b) Članovi Komisije su odlučili da otvore za javnost sastanak sa novoimenovanim ambasadorima Bosne i Hercegovine koji će se održati 7. juna 2006. godine u Sarajevu.

Predsjedavajući Komisije  
Hasan Čengić